

Ripoti o le Vaiaso:

Taulamua Riccarton Primary i le faafealofaniina o aganuu eseese

O le vaiaso na sei tuana'i i le Aso Tofi na faataunuu ai le faamoemoe o le pulega a Riccarton Primary e pei o le masani. I tausaga uma e potopoto ai matua ma le aai e faailoga le taua o le nonofo faatasi o tagata o aganuu eseese.

Saunoa le alii pule o Paul Irvin, o lenei aso faapitoa e aoga tele mo fanau a le a'oga, latou te a'oa'o mai ai le taua o le ola faatasi i se si'osi'omaga e le tasi se aganuu ae tele. E mafai foi ona nonofo faatasi.

Ua savalia nei le 10 tausaga talu ona faavae lenei aso, e laina tutusa ma le faamanatu a le lalolagi.

E feoloolo nai fanau Samoa o loo a'oga i le Riccarton Primary; o le tasi o sui o lana komiti faafoe o le tofa ia Lealiiee Tufulasi Taleni, e a'oga ai foi ona alo e to'alua.

E pei ona molimau ata, e maeu le lagolago a matua i le faamoemoe. O le avanoa foi e faaali ai siva ma pese a le fanau e faailoa a latou aga.

Ae le gata ai i siva ma pese, auā o le isi vaega taua o aganuu o mea taumafa. Na lei faatafa le aumaga i le gasesega; na totoe palusami, foi matua ma faalumaga e talamasinei le fealofani. *Lipotia e Fili Fuaiaava*



Ata i luga a'e matua a RP maimoa i faafiafiaga; i luga faia'oga ma le pulega a le a'oga

Auga o aute le gagana muamua i le faasoaa tama a le fanua

Soo se mea e ta'u ai le gagana toe tumu ai ma ponaoo o le gagana e le iloa poo ai le 'auga o aute.

Ae na tasi le faafitiga i a i latou uma o le gagana ia faamuamua.

O le vaiaso ua te'a na faataunuu ai le faamoemoe o le UC Maori i totonu o le iunivesite Kenetaperi, o lana fono faaletausaga, ma o le autu sa iloiloaina o le sootaga i le va o le tofa manino faatama a le fanua ma le a'oga faapapalagi. Sa tilotilo i le sootaga o le pule faakolone sa taomia ai tagata Maori ma le tulaga afaina o i latou i soo se itu; e oo lava i le tulaga o su'esu'ega i le atamai. O loo taomia pea i le faumalo a papalagi i auala e su'esu'e ai, ae o loo iai auala a Maori lava ia e tatau ona tapa i ai.

Sa auai nisi o suafa lausilafia i le lalolagi Maori e pei o Dr Sir Tipene O'Regan, Dr Sir Toby Curtis, ma Dr Wally Penetito sa anoa ai le faasoaa.



TAMA A LE FANUA: Dr Wally Penetito, Dr Gail Gillon, Dr Sir Tipene O'Regan, Dr Sir Toby Curtis, Dr Angus Macfarlane. O nisi o ponaoo o le lalolagi Maori sa auai.

O nisi o ana failauga e malaga mai fafo, e pei o le tamaitai o Dr Lana Leslie mai le iunivesite a Sini. O le alii polofesa ia

Dr Angus Macfarlane sa taumalae mo le UC. E pei o le upu, na foi si gogo i lona itulagi ma si ana i'a o le faiva. *S. Aukuso*

*Faasoa o le Vaiaso:***ia faasa'oloto aganuu mai le lotonuu sese**

Ua lofia le lotoifale Pasefika i Aukilani ona o le mea sa fai e se tasi talavou i le fu'a o le malo Samoa.

Ua iloa o ia o se Toga, ae iai foi ni ana fāiā faaSamoa. A tala foi le gafa Polenisia e fesoota'i lelei; o uso lava.

A saili foi le sootaga i le lotu e felata'i tele; to'atele aiga e Toga pe Samoa le tina, o fanau e mitamita i o latou faasinomaga e lua. O i latou na e aafia tonu lagona i lenei vesiga.

E le fou le va o talavou Toga ma Samoa. O se va e maaleale. E manatua lelei e le to'atele le faalavelave i Otara na maliu ai se tama Toga—e lei faimisa; ma ona iu tuga ua toe fagua i lenei taimi.

Na vave ona faasalavei le faipule ia Aupito William Sio a o le fesili, faamata o le a foia ai nisi vevesi e tula'i mai? Le ono toe laasia o le tuaoi ua tuu i ai le tapu talu lena faalavelave?

O lea foi ua saunoa mai le ta'ita'i o le malo Samoa, e faafilemu le tulaga e ala i le tatalo atu i ta'ita'i o faiganuu e lua, o i latou o iai le malosi e fofo ai.

O le upu moni e le mafai e se malosi ona taofi le pule a le faalogona (emotion) i le tagata, lea e ta'u e le aumatutua o le moge osovale, aemaise lava mo talavou laiti. O iai i latou i le laasaga o suiga i le tino ma le mafaufau e mafua ai ona latou faia ni filifiliga sese, pe "valea" foi e pei ona saunoa Tuilaepa. (Sa tatau foi ona faailoa se lafoga malosi mai le malo Toga e ta'uvaleina ai le mea ua fai).

O le taimi o le osoosoga o le malosi e fia fa'aaliali lona tagata i le lalolagi. Mo le tele o fanau o le faaali o le malosi ma foliga i fafo. Faafetai i le Facebook ma le tweeter ua faigofie ona fai sea faaaliga. Pau le faanoanoaga, o le fa'aaliga o le vaivai i luga o le vaivai.

Ana tupu se mea faapea i le 20 tausaga tuana'i e gata lava i sina tama'i pa'usisi o loo tupu ai, ma nai tagata e vaai i ai; aso nei o le taimi lava e faatino ai o le taimi foi lena e maimoa ai le lalolagi. O le mata'utia lea o le pule a le tekonoosi lea ua tuu i lima o fanau i nei aso. Ana o se pomu ua tatou afaina uma.

O le mafua'aga lena o le popole o malo e iai Saina ma Korea Matu i le tekonoosi; auā ua mafai i lena malosi ona lafotu se malo e pei ona tupu i nuu Arapi e lei mamao atu.

Mo tatou i si'osi'omaga o aganuu e tele ma eseese, e mafai i le tekonoosi ona tafu le afi o le inoino e sasao a'e i se taimi vave ma afaina ai le to'atele.



Ona tala lea le va i le igoa (Toga, Samoa) e faaeseese ai, e tauave e le lotonuu sese e le fia toilalo le tasi i le isi. Ona fua mai lea i faanoanoaga.

E iai ni mea e fia faatau i le faasoa. Muamua, o le sao o ta'ita'i Pasefika i le foia o nei ituaiga tama'i. O se mea e tatau ona fa'aaoga lelei e leoleo le malosi o i o tatou ta'ita'i i soo se taimi e aliali a'e ai.

O le tele o a tatou talavou o ni sui o se mafutaga, a le o le lotu, o se a'oga, se kalapu, o loo iai ni o tatou ta'ita'i e mafai ona faauilavea.

Lona lua, o le pule a le tekonoosi o faamatalaga, liutino mai i le mau tautua molia i le emo o le mata; ta'ua e se tasi o le aganuu fou ua suia aganuu a le fale, o le pule fou ua fulia i luga le faavae atoa o sosaiete i o latou sootaga masani.

Ua le faigata i se tama ona lafo se upu pe tuu se ata i luga o le utube auā ua faigofie ona fai; ua leai foi se leo fautua mai matua, ua fai lava ia. Ua na le iloa ai le mata'utia o talutalu, ma tupu ai le lagona faatalale. E pei o lenei faata'ita'iga.

O le mea lea e lagolagoina ai le tatau ona aumai le mataupu i totonu o talanoaga a le Pasefika, i soo se auala o fesoota'iga, ina ia oo le fe'au i le fanau. Tele sootulau i isi mataupu ae lelei se upega e tapu'e ai le va fealofa'i ma le nofo lelei o tupulaga a le Pasefika! Aemaise lava le va o Toga ma Samoa.

Lona tolu, o le sootaga o taaloga ma le lotonuu. Lotonuu o se faalogona malosi e fusua, faamanaina pe faapogisaina foi le vaai. Lotonuu lelei e faavae ai faia lelei ma isi; lotonuu sese o le fili o le nofo lelei, e ao ona tineia i soo se tau.

O le faamanatu a le tala faasolo, ia aogā le maliu o David Fuko e lei mamao atu, e lapata'ia ai itu e lua i le iuga faanoanoa, pe a ta'ita'iina tatou e le lotonuu sese.

“mafaufauga o le vaiaso”

A sui le mata i le mata ona tatou feoa'i
pogisa lea i le olaga Mahatma Gandhi

*Tulimanu o Pola Vai***Alofa faasao le failele ma le pepe**

Malo le folau i le mamalu o le aulaitau, viia le Tautai Sili o le folauga.

Ia, ua tatou iai faatasi ma le fanau i le tasi vaitau taua o le tausaga, o su'ega. O isi ua mapu mai lea tiute, o isi o loo lotolotoi ai. Ou te nofo lava a'u ma fai la'u tomanatu; pe sa lava la'u lagolago i le fanau i taimi o a latou su'ega.

E toe tu mai Samoa ma su'ega o le SC ma le UE, e pisi lava matua i mea fai ae punou ta'ita i le api ma moe ai. O le molitu sa fai ai auā e lei soo Samoa i le paoa i lea taimi. Pau le lagolago taua o le nonofo mai o matua ma tilotilo mai, ma fai le lotu e tapua'ia le su'ega. O le lagolago sili lena.

I nei aso ua tele le mau leo faalavelave amata lava i le selifoni ma le Facebook, e le o fanau a o le si'osi'omaga ua sui. Ae fai pea le tiute o matua, auā e leai se isi e faia. E malie le tala a se tasi a'u uo, o ia e oo loa i a Novema fai loa lana vavao. E le toe afea lona maota e tagata e oo lava i ona aiga. A iai ni e malaga mai Samoa e taofi loa se'i iloga lava ua uma Novema ona faato'a sauni mai lea. O lana tala, o le masina lea e faasao e sauni ai lana fanau mo su'ega. Ia, e moni le upu, o lau e toto nei e fua mai taeao; ua iu manuia a'oga a le fanau ona o le faatau e lea tamā o lana pitolaau.

Tau ane la'u faitau i se talosaga a se tasi tina mo le faasaoina o a'oga siata. Manatua foi o le pepe lea a le Act na faatosaga ai le National ae tausitama ai Flavell. Ia, o le popolega auā e lei malosi lelei le failele a o lea ua folafola e le malo fou le togi i fafo ma le tainamu. O lea ua faasola e le palota le tausitama ma le faatosaga ae meme ai le failele ma le pepe. Ia, na ona valuvalusia aa o le fau e pei o le upu. Faaola si pepe. E leai se tagata e vale. Vaai foi ia Mose! O lea foi ua tatou iai i le vaitau o le pepe o le Kerisimasi; taumafai Herota e fasioti si tamameamea. E ofo i le le to'e'e.

O lea ua iloa e aogā lea faiga mo nisi o fanau. Pau le mea o le ave ese o le uiga faapito o Farao. Ua tatau loa ona faaofi atu i totonu Pasefika; afai ua tatala i Maori aisea e te'ena ai i a Samoa ma uso Pasefika? Ou te matuā tatalo atu i le malo e aua le tia'ia le pepe; o le pepe lena e ta'ita'ia le Leipa i isi manumalo e 10 o i luma.

Ae tatou talosia faatasi le taaloga a le Toa Samoa ma uso Toga; poo ai e malo a ia 'aua ne'i malo le fili ma le itu vaivai o tagata. Talosia foi le sauni atu o fanau i su'ega, tatou toe feiloa'i i lena vaiaso.

O le popo e pa'ū po

O le alii o Manuele na fesili mai pe aisea e sa ai ona tufi popo i le po. Manatua o le vavao lenei sa ta'ua i le tatou Laufatu i le vaiaso ua mavae. Ua leva lava ona faalogo i ai i lea upu, ae le iloa pe aisea le mafuaaga.



O ni faamatalaga nei e faatatau i ai.

E faapea le tala ina ua fasi le tuna a Sina ona totō lea o lona ulu, e pei o lana poloa'i, ma maua ai le laau o le niu. Ua malamalama le tala, o soo se taimi e inu ai Sina i lona suavai o lena foi ua feiloa'i atu i le tuna sa avea ma ana fagafao.

O le tasi o vavao na ta'u atu e le tuna ia Sina, ia tau o le ao e inu ai ae aua lava i le po. E mafua lea auā e iai isi aitu e manatu e nonofo i le popo poo le niu, faapea latou o le a latou maua ai le mana o le tuna.

O le mafua'aga lea o le vavao a Samoa, aua lava ne'i tufia le popo e pa'ū i le po. Faatali se'i oso le la, o le taimi lea e o ese ai aitu sa pipii i le popo poo le niu foi.

Ina ua taunuu le lotu Kerisiano ona faapea lea o nisi e lelei ona tofotofa pe moni e iai ni aitu.

Ua o ni a'oa'o se to'alua e tufi popo i le afiafi po; ua fesavaliala'i solo i laua e su'e popo, e le talitonu i le leai o ni popo, ae faalogo atu o loo toulu mai popo i le la itu.

E o atu i ai e leai ma se popo, ae faalogo atu foi i le itu na o mai ai o loo toulu mai popo.

Na pa'ū ifo se popo i le mea tonu o loo tutū ai, semanu e to'ia ai se tasi o i laua, o ina na iloa ai ua lamatia i laua. Ma alu loa le taufetuliga i tai i le aai.

Ina ua la toe usu mai i le taeao na iloa ai le tele o popo na toulu i le po, o loo paepae solo mai i le fanua.

O se tasi o fanua e nofo ai le

teine-sa sa tufi popo ai ni tama. Ua ave na o popo e mafai ona la amoina ae nana isi popo e toe foi mai i ai.

Ua taunuu tama ma avega, ae toe faapea atu le tamā e faamalolosi e o e faauma mai popo o loo totoe i le fanua. A o lea ua tagi alise.

Ua faapea ona fai, ua foi atu i laua i le fanua i le mea tonu o loo nana ai popo. O lalo o le tafu'e o le aoa tele ua la'u i ai ma tuu ai.

Na o sina malamalama o le masina oso o loo gaoioi ai; ua tago atu le tama matua i popo ae tau lona lima i le ulu o se tagata. Ua e'e ma tamo'e ma alu loa le taufetuliga i tai.

Na iloa mulimuli ane o le ulu moni lava o se tagata. O se fuifui ulu ua tuu ai e se tasi na foi mai i se tafa o le taua i lena afiafi. Atonu na musu o ia e alu ma ulu i lo latou aiga ona o aitu o nei toa. Ona lafoa'i ai lea i le faaputuga popo.

Fai mai se tasi taofi e mafua ona lalata aitu i le popo auā o le niu e tupu mai ai, e le o se laau mao'i, o le laau na tupu mai i le tuna, o se saualii.

Lea foi e mafua ai se taofi a e fia talanoa i se aitu ona u'u lea o lou tino i se popo masa. Ona faapea lea o aitu o oe foi o se isi aitu.

Ia, ma le tala i se alii na tofotofa i lona aluga i le popo e moe ai. Malama a'e taeao ua malo lona auvae.

Ia, ua sui foi talitonuga i nei aso. Ua malosi le lotu ma le mana o le tala lelei. Mo a'u, pau le itu lelei o le le tufia o popo i le po, ina ne'i pa'ū ifo se popo i lou tumua'i e mafatia ai.

O la'u faauigaga lena o lenei vavao.

A ia manuia lava tamaiti.



O SE ATA O SAMOA



O se ata na tusia e le tamaitai tusiata Aielani o Mary Swanzy, i sana tafaoga i Samoa. O le a sau faamasinoga o le ata?

O SE SOLO A TUSITALA (RLS)

O lo'u
afa




E iai lo'u tama'i ata e muamua i o'u luma ma o'u tua
A o sona aogā mo a'u ou te le manatua
E tai pei lava o a'u mai o'u vae e tau i lo'u tumua'i
Na oso puna i o'u luma ma ma momoe faatasi.

O le mea sili le malie o ana auala e tu ai
E mua le faata'ita'i i aga a tamaiti e fai
O isi taimi e fana i lugā pei se polo pulu fitifiti
A o nisi fo'i taimi e tupu laitiiti pe na o se inisi.

E leai lava sona malamalama i taaloga a tamaiti
E pei a'u o se vale i gaoigaga a lenei alii
E pipii mai i o'u tua e pei ni aga a se pala'ai
Ua avea lenei ata ma se mea ou te māsiasi ai.

I le tasi taeao po lava a o le i oso le la
Na ou mauaina ai ni matāua fe'ilafi o fepiiti i fuga o lālā
A o le taimi lea o loo tagulu pea le tama'i ata paie
i luga o le moega o loo moe ai gapepe.

Robert Louis Stevenson; faaliliu e le OLA



05—11 NOVEMA

05

1839 Saunia e Charles Wilkes se taiala mo faiga pisinisi e aafia ai le taulaga o Apia

1884 Talosaga ta'ita'i Samoa ia Vitoria Peretania ia avea Samoa ma ana kolone

06

1839 Sauni misionare Samoa e tuuvaa mo le galuega tala'i

1903 Faavae le ulua'i falemeli i Savaii i Fagamalo

1914 Taofia e Logan (Lokeni) le toe talia o meli mai Siamani

1975 Amata sootaga faamalo va o Samoa ma Saina

07

1918 Taunuu i Apia le vaa la'uuta mai Aukilani le SS Talune na aumaia le siama o le fulu Sepania

09

1880 Tuumalo Malietoa Talavou

1899 Malilie Siamani ma Peretania e fesuia'i a la pule i motu; Samoa i le vaaiga a Siamani

1930 Faataga e le malo Niu Sila Hart (Ata) e molia Taisi Nelesoni i le moliaga o le taumafai e lafotuina le malo

10

1839 Tuua Apia e Charles Wilkes ma lana aumalaga

1954 Uluai tauaofiaga e talanoa i se faavae o Samoa

11

1911 Aso Soifua o Vaai Kolone palemia lona fa

1941 Maliu tusitala o le Samoa Inseln, Augustine Kramer

2000 Lu'i e David Tua Lennox Lewis siamupini lalolagi



LE aso 6 o Novema 1975 na saina ai le feagaiga o le sootaga faamalo i le va o le malo tele o Saina ma le Malo Tuto'atasi o Samoa. O le alii palemia a Samoa, Tupua Tamasese Lealofi le Fa na saina mo Samoa, a o Pei Tsien-chang na saina mo Saina. E faapea se faaliliuga o se tasi vaega o le feagaiga: "Ua malilie Malo e lua e atia'e se faia fealofa'i, faigauo ma felagolagoma'i i le va o atunuu e lua i luga o le faavae o le feavata'i i le pule tutasi ma le . . . ola filemu faatasi." I lenei lava maliega o lo ua tamau ai le ioega a Samoa i le na o le tasi le malo o Saina i le saofa'iga a malo o le lalolagi. O lea ua te'ena ai e Samoa Taiwan. Ua atoa ai nei le 42 tausaga o le faigauo. I le 1980 na avea ai le palemia a Samoa, Tupuola Efi, ma malo taualoa a Saina, na muamua le asiasiga a le Ao o le Malo, Malietoa Tanumafili le Lua i le tausaga e 1976. Talu mai lena o loo matauina pea le gaoioi o lona faatinoga, aemaise i le sagai mai o Saina e tali mana'o ia Samoa i soo se vaega o ana fuafuaga tauatina'e. Ae le na o Samoa ae faapea foi isi malo o le Pasefika. E faitau miliona tala o loo sasa'a mai e Saina i atina'e o Samoa ma ona tuaoi, i le vao tuutuuga faaunetupe e lelei mo latou. E le o misi i le vaai a Amerika le iai o Saina i lenei itulagi; lata mai nei se faailoaga o le toe faaolaolaina o sootaga a le malo tele ma lenei itu. Ua iloa foi ni faailoilo o le soso mai o Rusia i totonu. O se faailoaga o le taua o le Vasa Pasefika i le lalolagi mo le vao mafuaaga. O le popolega tele i ta'ita'i a le Pasefika o le avea o lo tatou vasa ma se nofoaga e faaoloatauaina. Ma toe oo mai ai mafatiaga o le talafaasolo sa tatou ui mai ai.

Novema i le Tala Faasolo o Niu Sila



05 Nov 1881. 1600 fitafita a le malo osofa'ia le tetee filemu a tagata Maori i Parihaka; mafua le tetee ona o le fao faamalosi o eleele Maori e le malo

11 Nov 1918. Saini le maliega e taofia le taua i le va o itu taua e lua; ma ola ai le taua muamua

NIUPAC PUBLICATION

Email: evaleon.books@gmail.com
Phone: (03) 382-6674
Postal: 39 Basingstoke Street,
Aranui, Christchurch 8061

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA understands the rights of other copyright holders whose material we use and acknowledge always—apart from our own.

NIUPAC 2011

Editors:

Levi P. S. Tavita ~ ltavita8@gmail.com
Muliagatele V. Fetui ~ v.fetui@auckland.ac.nz
Saili Aukuso ~ saili.niupac@gmail.com

EVALEON BOOKS & NIUPAC PUBLISHING

Telefoni (03) 382-6674. Imeli: evaleon.books@gmail.com



Sponsors:

New Zealand
Lottery Commission

Evaleon Books &
Niupac Publishing

Tautua e ala i le gaosia o alaga'oa mo a'oga (tusi mo le a'oa'oina o le faitau i le gagana Samoa, tusi e a'oa'o ai gagana, kalena, posters, year-books, brochures). E tautua fo'i i le fa'aliliuga o gagana, ma le tapenaina o ni tusi e fia lomai i so'o se sionara o fatuga.





PASI ATU LA TATOU PULETINI I LE TOU A'OGA, AIGA, LOU TUAOI, AU UO, E AOGĀ MO LE FANAU A'OGA



Igoa: Noam Chomsky
Aso Fanau: 07 Tesema 1928
Ausiga: e ana le taofi i le gagana o se mea totino e fanau mai ma le tagata; o se leo faasalaese
Fetu: Satiteri



E le tau faailoaina Chomsky i le li'o o tagata aupito lauiloa a le lalolagi, poo le si'osi'omaga foi o a'oga ma su'esu'ega taule mafaufau. Na mua'i lauiloa i lona taofi i le kalama aoao e faalaugatasia ai tagata ola uma; e fanau se tagata ma totoga o le gagana, e ese mai le taofi lautele o se mea e afua mai fafo. Ae peisea'i o ona taofi faaupufai ua sili ona lausilafia ai; aemaise lava o lona tula'i mai o se leo faasalaese e lu'ina pulega a lona lava atunuu (Amerika). E talitonu Chomsky o le pogai o le sasao o faiga taufaamata'u i le lalolagi o Amerika; o Amerika o le puna o faiga faamata'u e ala i lona lagolagoina o na faiga. O lona aia fua i pisinisi a isi malo ma tagata ua mafua ai ona lamatia le lalolagi. I lona naunau e faumalo i ona taofi ma le puleaina o le tamaoaiga o le lalolagi ua le ese ai ma isi foi pule malolosi o le tala faasolo e iai Peretania Roma—poo le Isis o loo naunau e tinei. E leai se peresitene Amerika e sao i lana tilotilo; o i latou nei o taiulu i le galuega taufaamata'u numera tasi e taulamua ai le malo Amerika. Fai mai Chomsky, ana fa'aaoga tulafono na tasisi ai ta'ita'i o le Nazi, po ua tasisi uma foi ma peresitene a Amerika.

www.ola888.com

ATI A'E UPU:

sootaga tualoa (nauna). E faamatala ai sootaga i le va o ni malo ua malilie e feosiosia'i. Soa Peretania—diplomatic relations. sootaga faavaomalo (nauna). E faatatau i sootaga i le va o malo o le lalolagi poo tagata o aganuu eseese. Soa Peretania—international relations.

Otootoga

Tapena fanau mo suega NCEA

O le Aso Tofi aso 9 o Novema, vaiaso a sau e amata ai suega a fanau matutua mo tusipasi NCEA. Ona faasolo atu ai lea e aulia Tesema i lona aso 1. O se vaitau o lagona fetineia'i mo le fanau ae faapea foi faiaoga. Muamua, o le atupopole (stress) e o faatasi ma tapenaga, e aofia ai le popole pe pasi pe leai; poo fetau tapenaga ma mea e aumai i le pepa. A le faatonutonuina lelei le atu e ono aafia ai le suega. O nisi fanau ua ausia togi e maua ai le tusipasi, ona faaleano lea i su'ega, a ua fautua mai le alii pule o Patrick Walsh, e tatau lava ona faamalosi i su'ega faaiu.

Mana'omia le lagolago i le fale

I lenei tapenaga a le fanau e mana'omia le lagolago a matua ma le aiga. Muamua, faalalo le pisa ma le malomaloa. E fia maua se si'osi'omaga filemu e tofusao uma i ai le aiga. Ia taumafai matua e tatala sootaga o talanoaga ma fanau, ina ia femalamalama'i i lagona i lea vaitau taua. O le lave ia tatou tamaiti e le o mai ta'u mai o latou ua sauni i su'ega. Ae lelei i matua ona tauavamea mo le fanau ina ia maua le avanoa tatau e su'esu'e ai. E mana'omia foi le lava o le malologa a o sauni atu i le taeao o le su'ega. Fai mai foi le ausu'esu'e, e le o le umi o le taimi e fai ai meaa'oga a o le anoa o le su'esu'ega tusa pe laititi le taimi.

Tala fiafia mo le Kerisimasi

O le a saga faaopopo le fiafia i le tala i le pepe o le Kerisimasi i le folafolaga a le malo fou e faatelevave le faatinoga o nisi ana fuafuaga. E aofia ai na e faasino tonu i a'oga teseri (tertiary). O le faamoemoe ia amata faamamalu ana folafolaga i le aso 1 o Ianuari 2018. Mo fanau e fia ulufale i le iunivesite i le tausaga fou, i lalo o le ofo a le malo e leai se pili e totogia, ua tatau ona faaulu lau talosaga, e faagata i le aso 16 o Tesema. Fiafia foi i latou o loo a'oga, o le a maua se faasiliga i le alauni.

